



Broj: 01- 413/24

Sarajevo: 8.1.2025. godine

Šemsudin Mehmedović



BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
S A R A J E V O

PRIMLJENO: 08-01-2025			
Organizaciona jedinica	Klasifikaciona oznaka	Redni broj	Broj priloga
01-150-1-		96/25	

PREDSTAVNIČKI DOM

PARLAMENTARNE SKUPŠTINE BOSNE I HERCEGOVINE

n/r predsjedavajućeg

PREDMET: Zastupnička inicijativa kojom Predstavnički dom Parlamentarne skupštine Bosne i Hercegovine obavezuje Vijeće ministara Bosne i Hercegovine i Ministarstvo pravde Bosne i Hercegovine da, u skladu sa Zakonom o državnoj službi u institucijama Bosne i Hercegovine, preduzmu mjere protiv Marka Kubatlje, direktora Agencije za unapređenje stranih investicija - FIPE, rukovodećeg državnog službenika, jer je na lokalnim izborima 2024. godine bio nosilac liste kandidata Demokratskog narodnog saveza za Skupštinu Opštine Pale.

U skladu s čl. 8. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19 i 53/22) upućujem zastupničku inicijativu,

Predstavnički dom Parlamentarne skupštine Bosne i Hercegovine obavezuje Vijeće ministara Bosne i Hercegovine i Ministarstvo pravde Bosne i Hercegovine da, u skladu sa Zakonom o državnoj službi u institucijama Bosne i Hercegovine, preduzmu mjere protiv Marko Kubatlje, direktora Agencije za unapređenje stranih investicija - FIPE, rukovodećeg državnog službenika, jer je na lokalnim izborima 2024. godine bio nosilac liste kandidata Demokratskog narodnog saveza za Skupštinu Opštine Pale.

Образложење

Članom 6. Zakona o parlamentarnom nadzoru propisano je da parlamentarni nadzor provodi Parlamentarna skupština Bosne i Hercegovine posredstvom svojih domova, a članom 7. stav 2. istog zakona, utvrđeno je da se parlamentarni nadzor provodi radi preventivne zaštite od nezakonitog djelovanja, zloupotrebe položaja i ovlaštenja, prikupljanja informacija i činjenica o događajima koji se odnose na rad institucija i organa uprave Bosne i Hercegovine.

Marko Kubatlja, direktor Agencije za unapređenje stranih investicija - FIPE, rukovodeći državni službenik, je na lokalnim izborima 2024. godine bio nosilac liste kandidata Demokratskog narodnog saveza (u daljnjem tekstu: DNS) za Skupštinu Opštine Pale. Marko Kubatlja je ujedno i blizak stranački saradnik ministra sigurnosti Nenada Nešića, predsjednika DNS-a, jer je Marko Kubatlja trenutno predsjednik Opštinskog odbora DNS-a Pale, uprkos činjenici da je državni službenik.

Navedenim ušešćem na lokalnim izborima, Marko Kubatlija je prekršio zakon, jer je članom 16. Zakona o državnoj službi u institucijama Bosne i Hercegovine **utvrđeno da rukovodeći državni službenik podnosi ostavku na mjesto u državnoj službi od trenutka kada je potvrđena njegova kandidatura za javnu funkciju na koju se bira direktno ili indirektno.** Također, navedenim članom 16. Zakona je utvrđeno da državni službenik ne smije obavljati dužnost, aktivnost ili biti na položaju koji dovodi do sukoba interesa sa njegovim službenim dužnostima, a **naročito da državni službenik ne može biti član upravnih i drugih odbora političkih stranaka i ne smije slijediti instrukcije političkih stranaka.** Državni službenik je dužan da prilikom postavljanja na mjesto državnog službenika predočiti sve informacije o djelatnostima i funkcijama koje obavlja.

Državni službenik Marko Kubatlija u javnosti istupa kao predsjednik Opštinskog odbora DNS-a, učestvovao je u izbornoj kampanji za lokalne izbore, iznosi političke stavove u medijima, a istovremeno kao rukovodeći državni službenik prima odličnu platu i ima službeno vozilo na raspolaganju 24 sata, kao i sve druge beneficije jednog rukovodećeg državnog službenika i direktora institucije Bosne i Hercegovine.

Nesporno je da je Marko Kubatlija funkcioner političkog subjekta DNS, što je nespojivo sa poslom državnog službenika.

Zbog svega navedenog, jasno je da Marko Kubatlija u kontinuitetu grubo krši Zakon o državnoj službi u institucijama Bosne i Hercegovine, te je potrebno da u što kraćem roku Vijeće ministara, u skladu sa članom 50. stav 1. tačka n. Zakona o državnoj službi u institucijama Bosne i Hercegovine razriješi Marka Kubatliju, sa dužnosti direktor Agencije za unapređenje stranih investicija – FIPE.

Članom 50. stav 1. tačka n. Zakona o državnoj službi u institucijama Bosne i Hercegovine je utvrđeno: „Državnom službeniku prestaje radni odnos ukoliko se utvrdi da je prilikom zasnivanja radnog odnosa dao neistinite podatke koji su služili kao dokaz u postupku zasnivanja radnog odnosa i na osnovu kojih je izvršeno postavljenje, ili ukoliko se utvrdi da je u međuvremenu prestao da ispunjava uslove propisane ovim zakonom“.

Također, Ministarstvo pravde Bosne i Hercegovine je dužno da preduzme zakonom utvrđene mjere protiv državnog službenika Marka Kubatlije i izrekne prekršajnu kaznu Marku Kubatliji u skladu s članom 63.a stav (4) Zakona o državnoj službi u institucijama Bosne i Hercegovine. Članom 63a. stav (4) propisano je da će se se novčanom kaznom od 2000,00 do 5000,00 KM kazniti rukovodeći državni službenik koji ne podnese ostavku na radno mjesto u državnoj službi nakon što je potvrđena njegova kandidatura.

Na sjednicu nadležne komisije i sjednicu Predstavničkog doma na kojoj će se razmatrati ova inicijativa, u skladu s članom 11. stav 2. Zakona o parlamentarnom nadzoru, potrebno je pozvati Borjanu Krišto, predsjedavajuću Vijeća ministara Bosne i Hercegovine, Davora Bunoza, ministra pravde Bosne i Hercegovine i Marka Kubatliju, direktora Agencije za unapređenje stranih investicija - FIPE, da u okviru svojih ovlaštenja, daju informacije vezano za inicijativu i odgovore na pitanja članova nadležne komisije i zastupnika na plenarnoj sjednici doma.

Napominjem da je članom 11. stav 4. Zakona o parlamentarnom nadzoru propisano da je pozvano lice obavezno pismenim putem obavijestiti tijelo koje provodi parlamentarni nadzor o razlozima spriječenosti prisustvu najkasnije 48 sati prije početka sjednice.

S poštovanjem,

ZASTUPNIK PS BiH
Šemsudin Mehmedović



Dostavljeno:

- naslovu
- a/a